

趙慶

經驗喉科

紫珍集

千頃堂
書局印
行

序

道光癸未予生甫四十日三兄一姊相繼殤於喉症予以遠避僅而獲免少長留心方藥獨於是科闕焉無聞垂三十年歲在庚戌又以是症殤堂妹一男一女一室人產未彌月以哭兒亡而予志益亟亟在必得矣咸豐元年辛亥道出潤州聞有售喉症秘藥者價雖昂而效實神且速亟購得以驗信不誣誠恨得藥之晚繼思購藥濟人不如自合之便而合藥又不若刊方流傳之為溥也於是密訪其方乃售藥家秘之數世雖萬金不以傳設法求之竟不可得又閱七八年始以重價得於其壻之壻手依方合驗隨手病除急付剞劂刊行以公諸世並敘其顛末如此至其序文圖像方歌治法及附載牙痛等症各治法悉依原本不敢增減一字云

咸豐十年小陽月旬曲楊啟葆舜華氏甫刊

重錄增補經驗喉科紫珍集上卷

鄱陽

黃梅谿

秘藏

雲陽

朱純衷

得授

姪孫

朱翔宇

增補

紫珍喉科原序

予師乃三山上之禪師。得授方士七十二種圖像。二十針法。十八良方。瞭然在目。依方用藥。無有不愈者也。夫人之咽喉。迺一身之樞紐。百節之關津。與胃相接。呼吸所從出。非三焦五臟之統要乎。假若胃膈之間。蘊積熱毒。致生乳蛾。壅塞不通。乃為咽喉之大病也。或如乳頭形。如櫻桃。或腫痛吞吐不利。甚則生重舌。雀舌。弄舌之類。大凡治法。先去風痰。以通咽膈。然後解其熱毒。若熱毒冲於上腭。帝丁紫腫。定生懸癰。或腑寒肺熱。致於上腭不利。飲食有碍。是內痰上升。後成痰結。咽喉腫痛不通。帝丁或吐於前。或噎於後。學者所宜詳審。用藥行針。而內加治法。隨機應變。豈可苟焉者哉。若或吐綠涎。是心胆生氣死在旦夕。不可治也。又有纏喉鎖喉。腫腭懸癰四症。十無一全。豈不悲哉。予清夜細思。急用三黃涼膈等湯。口噙冰片玉匙等丸。即日可保。方似簡而功效無窮。誠為百世良方也。吁。吾師智通天地。術貫義農。百發百中。資全仁壽。益甚多矣。生雖菲才。

幸育門下。深得秘傳之妙。故為之序焉。

嘗謂吾人氣機呼吸在喉。而瞬息存亡之界亦在於喉。喉之係於人蓋甚重矣。胡可令受病哉。致病之由。啟於不遵衛生故也。或脾受熱毒。蘊積胸膈。口腹多嗜煎炒。或膏粱厚味。飲酒過度。不辭勞力。貪嗜炙煨熱毒之物。受鬱結之氣。感冒風寒。濕熱內積。痰火上蒸。辛苦越格。種種根源。皆病之所由。以浸於喉。其症七十有二。各種不同。且如喉痺之害。有陰有陽。而陰陽之狀。不可不察。紅腫外見者。陽也。悞服辛熱之劑。謂之以陽攻陽。毒氣愈甚。喉為出入生死之路。急欲奏效。必不得之數也。如舌生黃黑。飲食阻碍。吞吐不利。疼痛難忍。不見紅腫者。陰也。驟用寒涼剋伐之劑。反致生痰作燥。謂之以陰剋陰。其疾愈甚。致之於膏肓。縱有明驗。百無一生矣。此為醫者施治大略也。

且人之關鍵。唯喉乃出入之門。而帝丁為主。庸醫稍犯刀針。屢傷其命。不知其症。不識其形。而以執刀為戲。若是之愚也。予之入門四十餘年。見症多端。治之各殊。當察其表裏虛實。起病日數。表者散之。裏者利之。虛者益之。實者瀉之。須觀其人之壯弱。氣血盛衰。天之四季。究其根由。對症發藥。百醫百中。果能此道矣。足驗一斑之與。猥云老矣。懼來學者不得其門而入。因究症之所自。啟繪成

圖說具其法治。俾知神效。是以上列一圖。下陳一論。附其治法。後立一方。誠為後學者明之。使後之學者既得其旨。而日以繼日。月以繼月。沉潛反覆。何患病登天歿。而醫生之德。不幾乎再造哉。噫。夫一喉也。症生不一。面症對圖。豈能仍受病哉。抑吾人輕視喉關。不審虛實。擅用刀針。輕施涼劑。如斯治法。遇之實大。乃為正治。若逢虛火。不惟不效。而反害之。可不謂蠢其生理耶。業擅專門者。豈得認病糊塗。而不加意云。

呼者隨陰出。吸者隨陽入。呼吸之間。肺經主之。喉嚨以下。言五臟。為手足之陰。咽門以下。言六腑。為手足之陽。蓋諸臟屬陰。為裏。諸腑屬陽。為表。以臟者藏也。藏諸神流通者也。腑者府庫也。納諸水穀糟粕輪輸者也。喉以下屬五臟。喉應天相。乃肺之苗也。以肺屬金。乾為天。乾金也。象天之道。其中空長。可以通氣息。但與咽喉並行。其實兩義。而人多惑之。蓋喉為息道。咽中下水穀。其喉下接肺之氣。一云喉中三竅者。非果三竅。蓋水穀與氣各從一竅。而俱下肺中。肺中無竅。水穀何由入於下焦。

黃帝云。肺為諸藏之華蓋。藏真高氣於肺經也。故清陽出於上竅。濁陰出於下竅。若世人不知保養。風寒暑濕燥熱之氣。喜怒憂思悲驚恐之七情。感冒非理。

百病生焉。病症須尋所自。若喉痺乳蛾喉風喉閉風熱等症。當刺則刺。不可亂
醫。當吐則吐。不可妄治。此等之症。係性命之根。生死立見。不識其標本而攻之。
不察其虛實而妄治。失其法治。則禍不旋踵矣。可不慎哉。

實太師喉科論

夫咽喉者。一身總要。與胃相接。呼吸從出處也。若胸膈蘊積熱毒。致生風痰壅
滯不散。發為咽喉之病。喉內生瘡。狀如蜆肉。赤腫妨礙。窒塞不通。吐咽不下。甚
則身強口禁。凡治之法。先探風痰。以通咽路。然後追其熱毒。遲則有不救之患。
又有臟寒亦能令人咽閉。吞吐不利。宜用解施治。或曰。治法視人微則正治。用寒
涼等劑其則從治。用溫熱探痰出血。隨所施治。或於少商刺血。行氣冲追於外者。
必外敷以藥。予嘗以鵝毛蘸米醋攪喉中。探吐風痰稠涎。蓋酸能取痰。又能消
積血。若腫而不散者。先吹本藥。以小刀刺破出血。用秘藥吹之。內服射干青黛
甘草桔梗山梔粘子之類。如三黃涼膈等湯。隨症佐利為方。以散上焦之熱。外
敷以生地伏龍肝韭根皆可。如金縷散之類。若咽喉生瘡。或赤或白。赤者多血。
大率多是痰熱。先以桐油餞吐之。後用甘草湯解桐油之氣。此為治喉之大法。
望同道者補其不足。惟予之所甚幸。脩其未會之蔽。尤惟予之所厚望焉。

竇太師七世玄孫夢麟公咽喉論

夫咽喉一科。昔漢卿公立論於前。予豈敢有復言。予嘗獨坐細思。殆有不容已也。然斯喉也。乃性命之關。氣機出入飲食之所深為至重。且為精氣要路。肺與大腸表裏之別。臟腑上通咽喉。下為大腸。出入門戶。肺乃人一身之華蓋。應五臟生死之元門。入穀則昌。絕穀則亡。須臾之間。變症不一。致使朝生暮死。暮起早亡。惟肺主金。金主氣。而生津液。灌溉一身。流潤百骸。金能生水。生生不已。循環無端。順則五臟華敷。百關通暢。乃為養生之道。若不遵衛生。調理失節。陽明燥金。以致火尅而生痰矣。咽喉之症。從熱而係陽之標。故推而治之。可以解熱。去除其毒。祛風順氣。則自然安全矣。昔者丹溪漢卿二公。以米醋攪喉中。以出痰涎。予見以為太酸。則燥。宜先用黃蘗汁。加明粉灌入喉中。以吊其痰。次用醋。仍前加元明粉灌之。後用白蜜湯潤之內。服牛黃清心丸。或化痰丸。以墜其痰。施以二陳湯。加減服之。若喉中聲出如雷。厭食眼張。天柱或側倒。下陷黑唇焦鼻。氣急目睛突出。汗出如珠。少商無血。盧扁復出。不能救矣。既患咽喉。口舌之症。延及頸頂。面發腫。如大紅色。藥療不及。急用磁鋒。砭去其血。用雞子清調乳香末潤之。立瘥。再以芭蕉樹根杵汁潤之。以解其毒。若舌腫而紫黑者。急刺去

血吹秘藥甚效。予嘗以此法行之。頗治衆多。故此理敢以發明。

孫真人纏喉風論

夫纏喉風屬痰熱積咽。喉內外皆腫是也。外面無腫。聲似癡啞。而身必發熱。面色紅赤。此乃熱毒之氣極重。外面有腫。身亦發熱。邪火外發之原也。或牙關不強。內外不腫。但咽中紅者。由暴感積熱在心。如左邊病退。傳及右邊。此餘毒未盡也。咽喉中數症。有積熱。有風熱。有客熱。有病後餘毒未除。變化乳蛾者。其症不一。喉中有腫。紅微白。其形若臂者。此風毒喉痺也。皆因熱毒所感。風毒相搏。所發故也。或咽中有腫。帶紫色者。迺客熱。謂其人暴感熱毒之氣。壅塞喉間。須用木通。元參。生地。芩連。梔子。瀉心。經之火為要。或有傳變木舌者。皆心經蘊積熱毒。致口中有臭。痰服三黃涼膈為要。吹用秘藥。再以刀刺出血。或風毒喉痺。內外俱腫。乃內外之氣積於喉間。風痰相搏。素問無風不動痰。無痰不受風。風痰壅塞。結於喉間。形如雞子。其色微白。外面腮上有腫。身發寒熱。牙關強緊。言語不出是也。先吐其痰。後服荊防敗毒散。喉中腫處。下刀去血。吹秘藥於上。次日腫消。吹生機散收口。治喉之道。如斯法。治凡我同道。活潑而施。

丹溪喉風論

夫喉風喉痺皆由痰火而成。須別五臟虛實之不同。所起根源之有別。且如忿怒失常。肝火動也。勞傷過度。心火動也。膏粱燻炙。胃火動也。謳歌憂惱。肺火動也。房勞不節。腎火動也。所以君火一動。相火隨焉。以致火上痰升。發於咽間。腫痛而漿水不入也。其症可謂危且急矣。療治之法。急則治其標。緩則治其本。治標者。用刀吹藥探痰等法。治本者。服藥降火化痰補虛後之方劑。其於治標已詳悉矣。其於治本尤為備也。諸家方脉。但云治風熱而未云治痰熱。但云治痺脾火而未云降肝腎火。予雖性拙。贅以管見。如挾痰加以貝母。瓜蒌。半夏。花粉。或如二陳。千緡之類。如挾心火加以黃連。梔子。木通。如三黃之類。如挾脾火加以芍藥。大黃。石膏。如清胃。涼膈之類。如挾肝火加柴胡。黃連。或如小柴胡湯之類。如挾肺火加以黃芩。梔子。桑白皮。如桔梗化痰之類。如挾腎火加以生地黃。柏知母。如四物之類。但未知賢哲以為何如。予又嘗論夫胃肝腎三經之火。各有所因而生。彼富貴家醇酒厚味。多生胃火。婦女隱憂不發。多生肝火。好色勞傷。多生腎火。人之五臟六腑皆有火。不知此三經之火。嘗變見而為病者多矣。然一入病人家。登其堂。便見其人之病。再究其起病之由。用藥自見其獲効。

皇甫雲州喉痺論

內經云。一陰一陽。結謂之喉痺。王太璞云。一陰者手少陰君火。心主之脉氣也。一陽者手少陽相火。三焦之脉氣也。二脉正絡於喉。然氣熱甚則內結。內結甚則腫脹。腫脹甚則痺。痺甚則不通而死。原病式云。痺者不仁也。俗作喉閉由塞也。火生腫脹。故熱居上焦而咽噎腫脹也。咽喉之疾。生死反掌。凡腫脹甚者。急宜刺去惡血為上。然後用寒涼藥隨症調之。子和云。喉痺不歸之火相去遠矣。已上之說。屬火熱明矣。亦有伏氣病名腎傷寒。謂非時暴寒。伏毒於少陰。始若無病。旬日乃發。脉微弱。常咽痛。法治不必下利。當以辛熱藥攻其本病。順其陰陽。則水升火降。而喉痛自已。又有少陰咽痛者。乃少陰傷寒不傳太陽。寒邪抑鬱內格。陽氣為熱。上行於咽門經會之處。寒熱相搏而成咽喉痺。當以辛溫甘苦制其標病。以通咽噎。二者之病。若誤用涼藥。卒致不救。嗚呼冤哉。學是科者。可不深究之。

雲州喉痺歌

喉痺皆因二火攻。風熱痰塞在喉嚨。致生血泡咽。關閉性命危。亡旦夕中。砭血攪痰為上策。寒涼直治定收功。咽喉亦有陰經症。誤服寒涼立見凶。

陳若虛咽喉虛實論

夫咽喉昔漢卿公皆言屬肺。予言雖屬於肺。然所致有不同者。自有虛火實火之分。緊喉風慢喉風之說。又咽為心肺肝腎呼吸之門。飲食聲音吐納之道。此關係一身害人甚速。故曰走馬看咽喉。不待少頃也。假如虛火者色淡微腫。脉亦細微。小便滑白。大便自利。有因思慮過度。中氣不足。脾氣不能中守。虛火益致上炎。此症先從咽喉乾燥。飲食防碍。咳嗽痰涎。呼吸不利。斑生苔蘚。壘若蝦皮。猶如茅草長刺。喉間又如硬物噎於咽下。嘔吐酸水。噦出甜涎。舌生白苔。唇如礬色。聲音雌啞。喘息多痰。以上數症。皆由虛火元氣不足中來。治此不可悞投涼藥。上午痛者屬氣虛。用補中益氣湯。加麥冬五味牛蒡元參。午後痛者屬血虛。用四物加黃柏知母桔梗元參。如服不愈。加香附為引導。亦從治之法也。而實火者過用醇醪膏粱厚味。疊褥重裘。哺食辛熱。多致熱積於中。久則火動痰生。發為咽腫。甚則風痰上壅。咽門閉塞。少頃湯水不入。聲音不出。此為喉閉。緊急喉風。用藥療總緩急。用針刺喉間。發泄毒血。隨用桐油鵝翎探吐稠痰。務使痰涎毒血出盡。咽門得開。湯藥可入。語聲得出。乃止。服清咽利膈湯。疎利餘毒。如牙關緊閉。難以針刺。先刺少商出血。關閉自開。倘如針刺無血。探出無痰。聲如拽鋸。鼻掀痰喘。湯水不下。言語不出者。死症也。又有喉癰。喉痺。乳蛾。重舌。

懸癰等症。患雖腫而咽門半塞半開。痛雖凶而喉道有寬。有緊。此皆標病無本。用金鎖探吐痰涎。利膈湯推蕩積熱。膿脹腫痛者刺之。喉膿損而痛者益之。其患自安。凡喉閉不刺血。喉風不探痰。喉膿不放膿。痺蛾不針烙。皆非法也。若有痰火勞嗽咽痛啞音者。難治也。

紫珍要語

治喉者須審人之老弱。虛實用藥庶無差誤。古云。藥不執方。誠哉是言也。且如老人之病此者。乃脾家受溼。溼則生熱。熱則生風。前立方藥性寒涼。恐傷胃氣。況胃屬土。為萬物之源。大黃芒硝大傷下焦血分之真陰。只可初劑投之。病回之後。必用參苓以補其元氣。使瘡毒易合。寒涼剋伐。則氣血受傷。欲其速愈者難矣。如老者精神壯甚。尤不可拘於一也。年少之人。專痰火為之害。前藥雖寒。正伐有餘之火。祛脾土之賊。迺為當也。如年幼精神衰弱者。尤不可多服硝黃峻利。丹溪云。行醫猶若盤珠。毋使刻舟求劍。如風甚則角弓反張。必加羌活獨活喘甚多痰。必加瓜蒌貝母花粉紫蘇杏仁黃芩半夏。熱多加黃芩川連梔子。風痰用南星牙皂牛旁竹瀝姜汁牙癰牙疳。用升麻石膏瀉陽明之火。舌痛加黃連瀉心經之火。少用木通引心經之心火。從小腸而出。蓋心之係通於小腸。

故也。此乃開門逐賊之意耳。凡用藥引不必用姜。若內有半夏南星不得已者。只用一片可也。其燈心淡竹葉為要引。服藥必以食後徐徐而嚥。服畢必睡。俾藥性在於上焦尋病。毋令下部受寒。若用硝黃者。必以空心服之。使藥易於攻利。凡此之藥。乃清火化痰寒涼之劑。非溫補有益之方。遇其病不得已而用之。病退則止。若多服恐上邪未去。中寒又生。可不慎歟。

雲林喉脉歌云

兩寸洪溢。上盛下虛。脉忌微伏。

口舌脉云

口舌生瘡。脉洪疾速。若見脉虛。中氣不足。

夫舌乃心苗。口乃脾之屬。此以竅言之也。以部分言之。五臟皆有所屬。以症論之。五臟皆有所主。法治與咽喉少殊。且有虛實之不同。故特具分門以備參考。內經云。中央黃色入通於脾。開竅於口。藏精於脾。故病在舌。又云。心脉係舌本。脾脉係舌旁。肝脉係舌左。或因風寒所中。則舌卷縮不言。七情所鬱。則舌腫滿不消。肝壅則血上湧。心熱則舌裂成瘡。脾熱則舌強滑。治因其風者散之。寒者溫之。熱者清之。痰者開之。鬱者解之。

凡口舌腫痛。狀若無皮。或發熱作渴。用補中益氣湯。加麥冬五味元參。

凡眼烟觸體倦。少食。或午後甚盛。用四物湯。加黃柏知母桔梗元參。

凡舌瘡咽痛。口乾足熱。日晡益盛。為腎經虛火。用四物湯。同煎加減。

凡生口瘡。四肢逆冷。惡寒。飲食減少。或痰甚眼赤。乃命門火衰。用八味丸。

凡思慮過度。口舌俱瘡。咽喉不利。乃脾經血傷火動。

凡喜怒過度。症則口苦舌腫而痛。乃肝經血傷火動。

凡口舌生瘡。發熱惡寒。勞則體倦。不思飲食。此中焦虛熱。用補中益氣湯。加麥

冬五味。

凡口舌生瘡。口乾。飲湯不下食。乃胃氣虛不能化生津液也。用花粉人參白朮

茯苓甘草葛花之類。

凡口舌生瘡。飲食不思。小便不實。中氣虛也。用理中湯。若手逆冷腹痛。中氣虛

寒也。少加附子。

凡口舌生瘡。以致糜爛。或晡熱內熱。脉虛無力。此乃血虛而有火也。用四物湯。

加白朮茯苓麥冬五味。丹皮黃柏知母。

凡口舌生瘡。食少便滑。面黃肢冷。火衰土虛也。用八味丸。

凡口舌生瘡。日晡發熱。作渴吐痰。小便頻數。乃腎水虧損。下焦陰火也。加減八味丸。若熱來復去。晝見夜伏。不時而動。或無定處。或從腳下起。乃無根之火也。亦宜用加減八味丸。更以附子末。唾津調敷湧泉穴。若概用寒涼。損傷生氣。為病非輕。

凡口臭。牙齦赤爛。腿膝痿軟。或口酸。此腎經虛熱也。用六味丸為主。
凡口舌生瘡。舌乾黃硬。作渴者。用加減八味丸。以滋化源。俱藥水漱。
凡口舌生瘡。發熱惡寒。口乾喜湯。食少體倦。乃脾經虛熱。用補中益氣湯為主。
凡口舌生瘡。發熱作渴。飲食欲冷。大小便閉者。乃腸胃實火。用三黃湯加大黃。或涼膈散亦可。

凡舌強腮腫。舌痛。乃肝經溫熱。

凡痰甚作渴。口舌腫痛。乃上焦有熱。用探吐法。吐痰服涼膈散。

凡舌腫脹疼痛。宜刺舌穴。或腫高處。及邊旁舌下金津玉液之穴。出其毒血。以泄火毒。惟舌下瀧泉穴。及舌下三筋。俱不可輕用刀針。若輕用。誤犯其穴。則血流不止。霎時而死。可不慎哉。

凡口舌生瘡。咽喉腫痛。燥渴便閉。此三焦實熱也。用涼膈加減。頻頻噙嚥。不痛。

則已不宜多服。恐上熱未除。中寒又生。致使變症。莫測慎之。

凡口舌糜爛生瘡。二便閉塞。乃膀胱移熱於小腸。用導赤散瀉小腸之熱。用五苓散瀉膀胱之熱。或合而服之。吹用秘藥。

凡舌強滑胎黃。乃心脾熱也。

凡舌無故常自痺者。不可作風治。乃心血不足。用理中湯。合四物湯。服之有痰。加半夏瓜蒌。有火加黃芩川連。

凡口瘡服涼藥不愈者。乃中氣不足。虛火泛上。無制。用理中湯。甚者加附子官桂。噙之亦可。

凡胆熱口苦舌乾。為謀慮不決。致痰。用柴胡湯。加麥冬。棗仁。地骨。遠志。

凡實熱致口噤生瘡。用涼膈散。或西瓜水徐徐服。

凡口舌之病。每多於喉。臨時面症者。必細察其外症。飲食若何。寒熱若何。大小便清白赤澁若何。痰唾若何。瘡紅色黃白若何。細審如此。則知五臟六腑何經之症。何經之火。按經用藥。則百無一失矣。是斯論之精詳周細。可謂明矣。學者豈可庸庸而不會於心哉。始終如一。誠以潛心而研究。亦可以為醫宗之國手矣。勉之哉。